

## KOMBINOVANI TEKST

### Multilateralne konvencije za primjenu mjera koje se u cilju sprječavanja erozije poreske osnovice i premještanja dobiti odnose na poreske ugovore

i

### Sporazuma između Socijalističke Federativne Republike Jugoslavije i Republike Francuske koji ima za cilj izbjegavanje dvostrukog oporezivanja u oblasti poreza na dohodak

(koji se primjenjuje između Bosne i Hercegovine i Republike Francuske)

Opšte napomene u vezi sa kombinovanim tekstom

Ovaj dokument, u odnosima između Bosne i Hercegovine (BiH) i Republike Francuske (Francuske) predstavlja, kombinovani tekst za primjenu Sporazuma između Bosne i Hercegovine i Republike Francuske o izbjegavanju dvostrukog oporezivanja u odnosu na poreze na dohodak (Sporazum), potpisanog 28.03.1974. godine, izmjenjenog Multilateralnom konvencijom za primjenu mjera koje se u cilju sprječavanja erozije poreske osnovice i premještanja dobiti odnose na poreske ugovore (MLI) koju je BiH potpisala 30.10.2019. godine, a Francuska 07.06.2017. godine.

Ovaj dokument je pripremio nadležni organ BiH (Ministarstvo finansija i trezora) i predstavlja njegovo razumijevanje izmjena koje su u Sporazum unijete zbog MLI.

Dokument je pripremljen, na osnovu stavova o MLI koji su Depozitaru, nakon deponovanja instrumenta o ratifikaciji, dostavljeni 16.09.2020. godine od strane BiH i 26.09.2018. godine od strane Francuske.

Ovi stavovi o MLI se mogu promijeniti, kao što to i predviđa MLI. Promjena stavova o MLI mogla bi da promijeni efekte koje MLI ima na Sporazum.

Autentični pravni tekstovi Sporazuma i MLI imaju prednost i ostaju primjenjivi pravniktekstovi.

Odredbe MLI citirane u ovom dokumentu su neslužbeni prijevodi originalnih odredbi MLI na engleskom jeziku. Odredbe MLI koje se primjenjuju u odnosu na odredbe Sporazuma, uključene su u rubrike u tekstu ovog dokumenta u kontekstu relevantnih odredaba Sporazuma. Rubrike koje sadrže odredbe MLI su, uopšteno govoreći, unijete u skladu sa redoslijedom odredaba OECD Modela Poreske konvencije iz 2017. godine.

Izmjene teksta odredaba MLI učinjene su, u cilju njihovog usaglašavanja sa terminologijom koja se koristi u Sporazumu (kao što su, „Obuhvaćeni poreski sporazumi” i „Sporazum”, „Ugovorna jurisdikcija” i „Države ugovornice”) kako bi se olakšalo razumjevanje odredaba MLI. Promjene u terminologiji imaju za cilj poboljšanje čitljivosti dokumenta, a ne promjenu suštine odredaba MLI. Na sličan način su, izvršene izmjene dijelova odredaba MLI koji opisuju postojeće odredbe Sporazuma: opisni jezik je, u cilju lakšeg čitanja, zamjenjen pravnim odrednicama postojećih odredaba.

U svim slučajevima, upućivanje na odredbe Sporazuma ili na Sporazum, treba razumjeti kao da se upućivanje vrši na Sporazum, onako kako je izmijenjen odredbamaMLI, pod uslovom, da su se takve odredbe MLI i primijenile.

Upućivanje:

Autentični pravni tekst MLI može se naći na veb stranici Depozitara (OECD):

- na engleskom jeziku: <http://www.oecd.org/tax/treaties/multilateral-convention-to- implement-tax- treaty-related-measures-to-prevent-BEPS.pdf>

- na francuskom jeziku:

<http://www.oecd.org/fr/fiscalite/conventions/convention-multilaterale-pour-la-mise-en-oeuvre-des-mesures-relatives-aux-conventions-fiscales-pour-prevenir-le-BEPS.pdf>.

BiH Sporazum je objavljen u (“Službeni list SFRJ – Međunarodni ugovori”, broj 28/75) 06.06.1975. godine

Tekst Sporazuma može se naći na sljedećem linku:

[https://www.mft.gov.ba/srb/images/stories/fiskala/sporazum2oporez/05\\_francuska\\_sr.pdf](https://www.mft.gov.ba/srb/images/stories/fiskala/sporazum2oporez/05_francuska_sr.pdf)

Stav BiH o MLI koji je Depozitaru, nakon potvrđivanja, dostavljen 19.09.2020. godine, kao i stav Francuske o MLI koji je Depozitaru, nakon potvrđivanja, dostavljen 26.09.2018. godine, može se naći na veb stranici Depozitara (OECD) <http://www.oecd.org/tax/treaties/beps-mli-signatories-and-parties.pdf>.

Napomene u vezi stupanja na snagu i početka primjene odredbi MLI

Odredbe MLI koje se primenjuju na Sporazum, neprimjenjuju se od istog datuma kao i originalne odredbe Sporazuma. Svaka od odredaba MLI mogla bi da se primjenjuje od različitog datuma, što zavisi od vrste poreza na koji se odnosi (porezi po odbitku ili ostali naplaćeni porezi) kao i od toga, šta su BiH i Francuska navele u svojim stavovima o MLI.

Stupanje na snagu MLI: 01.01.2021.godine za BiH i 01.01.2019. godine za Francusku.

Ako drugačije nije navedeno u ovom dokumentu, odredbe MLI se, u odnosu na Sporazum, primjenjuju:

- u odnosu na poreze po odbitku, na iznose plaćene ili pripisane nerezidentima, kada događaj koji daje pravo na te poreze nastane 01. Januara ili poslije 01. januara 2021. godine;

- u odnosu na sve ostale poreze, za poreze koji se naplaćuju u odnosu na periode oporezivanja koji počinju 01. jula ili poslije 01. jula 2021.godine.

## SPORAZUM

### IZMEĐU SOCIJALISTIČKE FEDERATIVNE REPUBLIKE JUGOSLAVIJE I REPUBLIKE FRANCUSKE

#### O IZBJEGAVANJU DVOSTRUKOG OPOREZIVANJA U OBLASTI POREZA NA DOHODAK

Vlada Socijalističke Federativne Republike Jugoslavije i Vlada Republike Francuske,

[ZAMJENJEN članom 6. stav 1. MLI]

[u želji da zaključe sporazum koji ima za cilj izbjegavanje dvostrukog oporezivanja u oblasti poreza na dohodak,]

Sljedeći član 6. stav 1. MLI zamjenjuje tekst koji se odnosi na namjeru da se otkloni dvostruko oporezivanje u preambuli ovog Sporazuma:

#### ČLAN 6 MLI, stav 1 - SVRHA OBUHVAĆENOG PORESKOG UGOVORA

U namjeri da otklone dvostruko oporezivanje u odnosu na poreze obuhvaćene ovim Sporazumom bez stvaranja mogućnosti za neoporezivanje ili sniženo oporezivanje kroz poresku evaziju ili izbjegavanje (uključujući zloupotrebu Sporazuma, u cilju dobijanja olakšica predviđenih u ovom Sporazumu u posrednu korist rezidenata trećih jurisdikcija)

sporazumjele su se o sljedećim odredbama:

#### GLAVA I

##### OBLAST PRIMJENE SPORAZUMA

##### Član 1.

##### LICA NA KOJA SE ODNOSI SPORAZUM

Ovaj sporazum se primjenjuje na lica koja su rezidenti jedne države ili obje države ugovornice.

##### Član 2.

##### POREZI NA KOJE SE ODNOSI SPORAZUM

(1) Ovaj sporazum se primjenjuje na poreze na dohodak koji se ubiru za račun svake države ugovornice, njenih društveno-političkih i interesnih zajednica, bez obzira na sistem ubiranja.

(2) Kao porezi na dohodak smatraju se porezi koji se ubiru na ukupan dohodak ili na elemente dohotka, podrazumijevajući tu i poreze na dobit ostvarene prilikom otuđenja pokretnih i nepokretnih dobara.

(3) Porezi na koje se primjenjuje Sporazum jesu:

a) u pogledu Francuske

(i) porez na dohodak (l'impôt sur le revenu),

(ii) porez na dobit društva i drugih pravnih lica (l'impôt sur les sociétés), podrazumijevajući sve naplate obustavom, sve akontacije i avanse obračunate na gore pomenute poreze;  
(u daljem tekstu: "francuski porez")

b) u pogledu Jugoslavije

(i) predmetni porezi i doprinosi na dohodak fizičkih lica (zavisne djelatnosti, dohodak poljoprivrednih domaćinstava, dohodak zanatlija i drugih nezavisnih djelatnosti),

(ii) porez na ukupan prihod građana,

(iii) porez na dohodak koji potiče od upotrebe ili koncesije autorskih prava, патената i tehničkih usavršavanja,

(iv) porez na dobit stranih lica koja ulažu sredstva u domaće preduzeće u cilju zajedničke aktivnosti;

(u daljem tekstu: "jugoslovenski porez");

(4) Sporazum će se također primjenjivati na poreze iste ili slične prirode koji su zavedeni poslije dana potpisivanja ovog sporazuma i koji se dodaju postojećim porezima ili ih zamjenjuju. Nadležni organi država ugovornica obavještavaju se međusobno o značajnijim promjenama do kojih dođe u njihovom poreskom zakonodavstvu.

## GLAVA II

### DEFINICIJE

#### Član 3.

#### OPŠTE DEFINICIJE

(1) U smislu ovog sporazuma:

a) Izraz "država" označava, prema kontekstu, Francusku ili Jugoslaviju,

b) Izraz "Francuska" označava evropske okruge i prekomorske okruge (Gvadelupa, Gijana, Martinik i Reunion) Republike Francuske i zone koje se nalaze van teritorijalnih voda Francuske na kojima, u saglasnosti sa međunarodnim pravom i prema sopstvenom zakonodavstvu, Francuska može da vrši prava koja se odnose na morsko dno, na podmorje i njegova prirodna bogatstva,

c) Izraz "Jugoslavija" označava teritoriju Socijalističke Federativne Republike Jugoslavije i zone koje se nalaze van teritorijalnih voda Jugoslavije na kojima, saglasno međunarodnom pravu i prema njenom sopstvenom zakonodavstvu, Jugoslavija može da vrši prava koja odnose na morsko dno, na podmorje i njegova prirodna bogatstva

d) Izraz "lice" podrazumijeva fizička lica, društva i sve druge grupacije lica,

e) izraz "društvo" označava svako pravno lice ili svaki entitet koji se smatra kao pravno lice u cilju oporezivanja,

f) Izrazi "preduzeće jedne države ugovornice" i "preduzeće druge države ugovornice" označavaju uzajamno preduzeće koje eksploatiše rezident jedne države ugovornice ili preduzeće koje eksploatiše rezident druge države ugovornice:

g) Izraz "nadležni organ" označava:

- (i) u Francuskoj: ministra privrede i finansija ili njegovog propisno ovlaštenog predstavnika,
- (ii) u Jugoslaviji: saveznog sekretara za finansije ili njegovog propisno ovlaštenog predstavnika,

(2) U svrhe primjene Sporazuma od strane jedne države ugovornice, svaki izraz koji nije drukčije definisan ima smisao koji mu daje zakonodavstvo pomenute države koje se odnosi na poreze koji su predmet ovog sporazuma, osim ukoliko kontekst ne traži drukčije tumačenje.

#### Član 4.

##### PORESKI DOMICIL

(1) U smislu ovog sporazuma izraz "rezident jedne države ugovornice" označava svako lice koje, na osnovu zakonodavstva pomenute države, podliježe porezu u toj državi, bilo zbog toga što u njoj ima svoje prebivalište, svoje boravište, sjedište uprave, ili po osnovu nekog drugog mjerila slične prirode.

(2) Kada se, prema odredbi stava 1 ovog člana, neko fizičko lice smatra rezidentom svake države ugovornice, njegov status se određuje prema sljedećim pravilima:

a) to lice se smatra rezidentom države ugovornice gdje raspolaže stalnim mjestom stanovanja. Kada lice raspolaže stalnim mjestom stanovanja u svakoj od država ugovornica, smatra se kao rezident države ugovornice s kojom su njegove lične i ekonomske veze najtješnje (centar vitalnih interesa),

b) ako ne može da bude utvrđena država ugovornica gdje lice ima svoje vitalne interese, ili ako lice ne raspolaže stalnim mjestom stanovanja ni u jednoj državi ugovornici, smatra se kao rezident države ugovornice gdje ima uobičajeno boravište,

c) ako to lice ima uobičajeno boravište u svakoj državi ugovornici ili ako nema uobičajeno boravište ni u jednoj državi, lice se smatra kao rezident države ugovornice čije državljanstvo posjeduje,

d) ako to lice posjeduje državljanstvo svake od država ugovornica ili ako ne posjeduje državljanstvo ni jedne od njih, nadležni organi država ugovornica rješavaju pitanje zajedničkim sporazumom,

(3) Kada se, prema odredbi stava 1 ovog člana, lice koje nije fizičko smatra kao rezident svake države ugovornice, smatra se rezidentom države ugovornice gdje se nalazi stvarno sjedište uprave.

#### Član 5.

##### STALNO MJESTO POSLOVANJA

(1) U smislu ovog sporazuma izraz "stalno mjesto poslovanja" označava stalno mjesto poslovanja gdje preduzeće vrši, u cjelini ili djelimično, svoju djelatnost.

(2) Izraz "stalno mjesto poslovanja" podrazumijeva naročito:

- a) sjedište uprave,
- b) filijalu,
- c) kancelariju,
- d) fabriku,
- e) radionicu,
- f) rudnik, kamenolom ili svako drugo mjesto ekstrakcije prirodnih bogatstava.

g) izvođenje građevinskih i montažnih radova čije je trajanje duže od dvanaest mjeseci.

(3) Ne smatra se da postoji stalno mjesto poslovanja:

a) ako se stalna mjesta poslovanja koriste isključivo u cilju uskladištenja, izlaganja ili isporuke robe koja pripada preduzeću.

b) ako je roba koja pripada preduzeću uskladištena isključivo u cilju stvaranja zaliha, izlaganja ili isporuke.

c) ako je roba koja pripada preduzeću uskladištena isključivo u cilju dorade od strane nekog drugog preduzeća.

d) ako se stalno mjesto poslovanja koristi isključivo u cilju kupovine robe ili prikupljanja informacija za preduzeće.

e) ako se stalno mjesto poslovanja koristi, za preduzeće, isključivo u cilju reklamiranja, pružanja informacija, naučnih istraživanja ili sličnih djelatnosti koje imaju pripremni ili pomoćni karakter.

**[ZAMJENJEN članom 12. stav 1. MLI]**

[(4) Lice koje radi u jednoj državi ugovornici za račun preduzeća druge države ugovornice - osim ukoliko se ne radi o posredniku koji uživa nezavisan status i na koga se odnosi stav 5 ovog člana - smatra se kao "stalno mjesto poslovanja" u prvoj državi ako u toj državi raspolaže ovlaštenjima kojima se koristi na trajniji način i koja mu dozvoljavaju da zaključuje ugovore u ime preduzeća, osim ukoliko aktivnost tog lica nije ograničena na kupovinu robe za preduzeće.]

Sljedeći član 12. stav 1. MLI zamjenjuje član 5. stav 4. ovog Sporazuma:

**ČLAN 12 MLI - VJEŠTAČKO IZBJEGAVANJE STATUSA STALNE POSLOVNE JEDINICE KROZ KOMISIONE ARANŽMANE I SLIČNE STRATEGIJE**

Izuzetno od [člana 5. ovog Sporazuma] ali u skladu sa [članom 12. stav 2. MLI] kada lice radi u [Državi ugovornici] u ime preduzeća i, uobičajeno, zaključuje ugovore ili, uobičajeno, igra glavnu ulogu, što dovodi do zaključenja ugovora koje preduzeće, bez suštinskih izmjena, rutinski zaključuje, a ti ugovori su:

a) u ime preduzeća; ili

b) za prenos vlasništva, ili za dodjelu prava na korišćenje, imovine u vlasništvu tog preduzeća ili koju to preduzeće ima pravo da koristi; ili

c) za pružanje usluga od strane tog preduzeća,

smatra se da to preduzeće ima stalnu poslovnu jedinicu u toj [Državi ugovornici] u odnosu na bilo koje djelatnosti koje to lice obavlja za preduzeće, osim kada te djelatnosti, ako bi ih preduzeće obavljalo preko stalnog mjesta poslovanja tog preduzeća koje se nalazi u toj [Državi ugovornici] ne bi uzrokovale da se to stalno mjesto poslovanja smatra stalnom poslovnom jedinicom, u skladu sa definicijom stalne poslovne jedinice iz odredaba [člana 5. ovog Sporazuma].

**[ZAMJENJEN članom 12. stav 2. MLI]**

[(5) Ne smatra se da preduzeće jedne države ugovornice ima stalno mjesto poslovanja u drugoj državi ugovornici samim tim što vrši svoju djelatnost posredstvom agenta, komisionara ili svakog drugog posrednika koji uživa nezavisan status, pod uslovom da ova lica djeluju u okvirima njihove uobičajene djelatnosti.]

Sljedeći član 12. stav 2. MLI zamjenjuje član 5. stav 5. ovog Sporazuma:

ČLAN 12 MLI- Vještačko izbjegavanje statusa stalne poslovne jedinice kroz komisione aranžmane i slične strategije

Član 12 stav 1. MLI ne primjenjuje se kada lice, koje u [Državi ugovornici] radi u ime preduzeća druge [Države ugovornice,] obavlja poslovanje u prvopomenutoj [Državi ugovornici] kao nezavisni agent, a za preduzeće radi u okviru tog redovnog poslovanja. Kada, međutim, lice radi isključivo ili skoro isključivo u ime jednog ili više preduzeća sa kojima je blisko povezano to lice se, u odnosu na bilo koje takvo preduzeće, ne smatra nezavisnim agentom u smislu značenja iz ovog stava.

(6) Činjenica da neko društvo koje rezident jedne države ugovornice kontroliše ili je kontrolisano od strane društva koje je rezident druge države ugovornice ili koje tu vrši svoju djelatnost (bilo posredstvom stalnog mjesta poslovanja ili ne) nije dovoljna, sama za sebe, da mu koje od ovih društava bude smatrano stalnim mjestom poslovanja drugoga.

Sljedeći član 15. stav 1. MLI se primjenjuje na odredbe ovog Sporazuma:

ČLAN 15. MLI- Definicija lica blisko povezanog sa društvom

Za potrebe odredaba [člana 5. ovog Sporazuma,] lice je blisko povezano sa preduzećem ako, na osnovu svih relevantnih činjenica i okolnosti, jedno ima kontrolu nad drugim ili, oba kontrolišu ista lica ili preduzeća. U svakom slučaju, smatra se da je jedno lice blisko povezano sa preduzećem, ako posjeduje neposredno ili posredno više od 50 posto stvarnih interesa u drugom (ili, u slučaju kompanije, više od 50 posto ukupnih glasova i vrijednosti akcija kompanije ili stvarnih interesa u kapitalu kompanije) ili ako drugo lice posjeduje neposredno ili posredno više od 50 posto ostvarenih interesa (ili, u slučaju kompanije, više od 50 posto ukupnih glasova i vrednosti akcija kompanije ili stvarnih interesa u kapitalu kompanije) u licu i preduzeću.

### GLAVA III

#### OPOREZIVANJE DOHOTKA

##### Član 6.

#### PRIHODI OD NEPOKRETNOSTI

(1) Prihodi koji potiču od nepokretnih dobara, podrazumijevajući tu prihode od poljoprivrednih i šumskih gazdinstava, podliježe porezu u državi ugovornici gdje se ova dobra nalaze.

(2) Izraz "nepokretna dobra" je definisan prema poreskom zakonodavstvu države ugovornice gdje se odnosna dobra nalaze. Izraz u svakom slučaju obuhvata pomoćna dobra, živi ili mrtvi inventar poljoprivrednih i šumskih gazdinstava, prava na koja se primjenjuju odredbe privatnog prava koje se odnose na vlasništvo nad zemljom, prava plodouživanja na pokretnim dobrima i prava na promjenjive ili stalne naknade za eksploataciju ili koncesiju, za eksploataciju mineralnih nalazišta, izvora i drugih bogatstava zemlje. Plovni objekti i avioni ne smatraju se kao nepokretna dobra.

(3) Odredba stava 1 ovog člana primjenjuje se na prihode koji potiču od neposrednog korištenja, izdavanja pod zakup ili arendu, kao i od svih drugih oblika eksploatacije nepokretnih dobara.

(4) Odredbe st. 1 i 3 ovog člana primjenjuju se, također, i na prihode koji potiču od nepokretnih dobara nekog preduzeća, kao i od prihoda nepokretnih dobara koja služe za vršenje neke nezavisne djelatnosti.

## Član 7.

### DOHODAK PREDUZEĆA

(1) Dohodak industrijskog, trgovinskog ili zanatskog preduzeća jedne države ugovornice podliježe porezu samo u toj državi, osim ukoliko preduzeće ne obavlja svoju aktivnost u drugoj državi ugovornici posredstvom stalnog mjesta poslovanja koje se tu nalazi. Ako preduzeće obavlja aktivnost na taj način, dohodak preduzeća podliježe porezu u drugoj državi ali samo do stepena koji se može pripisati pomenutom stalnom mjestu poslovanja.

(2) Kad preduzeće jedne države ugovornice obavlja svoju djelatnost u drugoj državi ugovornici posredstvom stalnog mjesta poslovanja koje se tu nalazi, ovom mjestu poslovanja, u svakoj državi ugovornici, pripisuje se dohodak koji bi moglo ostvariti da je predstavljalo odvojeno i samostalno preduzeće koje obavlja iste ili slične djelatnosti u istim ili sličnim uslovima i koje posluje u punoj nezavisnosti sa preduzećem čije stalno mjesto poslovanja predstavlja.

(3) U obračunu dohotka stalnog mjesta poslovanja, kao odbitak priznaju se troškovi učinjeni za ciljeve kojima se ovo stalno mjesto poslovanja bavi, podrazumijevajući tu i rashode uprave i opšte troškove administracije u tu svrhu učinjene, bilo u državi gdje se nalazi to stalno mjesto poslovanja, ili drugdje.

(4) Nikakav dohodak se ne može pripisati stalnom mjestu poslovanja po osnovu činjenice da je ovo stalno mjesto poslovanja samo kupovalo robu za preduzeće.

(5) Dohodak od aktivnosti stalnog mjesta poslovanja određuje se, prije svega, prema bilansu tog stalnog mjesta poslovanja. U slučaju kad stalno mjesto poslovanja ne vodi uredno knjigovodstvo iz koga proizlazi odvojeno i tačno dohodak, može se pribjeći raspodjeli ukupnog dohotka preduzeća u cilju utvrđivanja dohotka stalnog mjesta poslovanja.

Nadležni organi država ugovornica će se sporazumjeti, u slučaju potrebe, i ustanoviti pravila raspodjele dohotka preduzeća u nedostatku urednog knjigovodstva iz koga proizlazi tačno i odvojeno dohodak koji se može pripisati stalnim mjestima poslovanja koja se nalaze na njihovim odnosnim teritorijama.

(6) Kad dohodak sadrži elemente prihoda koji su odvojeno tretirani u drugim članovima ovog sporazuma, odredbe ovih članova ne mogu biti dovedene u pitanje zbog odredaba ovog člana.

## Član 8.

### POMORSKA, RIJEČNA i AVIONSKA PLOVIDBA

(1) Dohodak koji potiče od eksploatacije brodova ili aviona u međunarodnom saobraćaju, podliježe porezu samo u državi ugovornici gdje se nalazi stvarno sjedište uprave preduzeća.

(2) Ako se stvarno sjedište uprave nekog preduzeća za pomorsku ili riječnu plovidbu nalazi na brodu, smatraće se da je sjedište u državi ugovornici gdje se nalazi matično pristanište ovog broda ili, u nedostatku matičnog pristaništa, u državi ugovornici čiji je državljanin lice u čiju se korist vrši eksploatacija broda.

(3) Odredbe st. 1 i 2 ovog člana primjenjuju se, također, i na dohotke koji potiču od učešća u pool-u, u zajedničkoj eksploataciji ili u nekom međunarodnom tijelu za eksploataciju.



## Član 9.

### UDRUŽENA PREDUZEĆA

a) Kada preduzeće jedne države ugovornice neposredno ili posredno učestvuje u upravi, kontroli ili kapitalu preduzeća druge države ugovornice, ili kada,

b) ista lica neposredno ili posredno, učestvuju u upravi, kontroli ili kapitalu preduzeća jedne države ugovornice i preduzeća druge države ugovornice,

i kada su, u jednom i drugom slučaju, dva preduzeća, u njihovim trgovinskim i finansijskim odnosima, vezana prihvaćenim ili nametnutim uslovima koji se razlikuju od uslova koji bi bili zaključeni između nezavisnih preduzeće, dohodak koji bi bez ovih uslova bio ostvaren od strane jednog od preduzeća, ali nije mogao biti ostvaren zbog ovih uslova - može da bude uključen u dohodak ovog preduzeća i odgovarajuće oporezovan.

Sljedeći član 17. stav 1. MLI primjenjuje se i ima prednost nad odredbama ovog Sporazuma:

### ČLAN 17. MLI – ODGOVARAJUĆE KOREKCIJE

1. Ako država ugovornica uključuje u dobit društva te ugovorne jurisdikcije, dobit za koju je društvo druge ugovorne jurisdikcije oporezivano u toj drugoj ugovornoj jurisdikciji, i shodno tome je oporezuje, i ako je tako uključena dobit ona dobit koju bi društvo prvo spomenute ugovorne jurisdikcije ostvarilo da su uslovi dogovoreni između ta dva društva bili oni uslovi koje bi dogovorila nezavisna društva, ta druga ugovorna jurisdikcija vrši odgovarajuću korekciju iznosa poreza koji je u njoj utvrđen na tu dobit. Prilikom vršenja te korekcije, vodiće se računa o ostalim odredbama ovog Sporazuma i, ako je to potrebno, nadležni organi ugovornih jurisdikcija će se međusobno konsultovati.

## Član 10.

### DIVIDENDE

(1) Dividende koje plaća društvo koje je rezident jedne države ugovornice rezidentu druge države ugovornice podliježe porezu u toj drugoj državi.

(2) Međutim, ove dividende mogu da budu oporezovane u državi ugovornici čiji je rezident društvo koje plaća dividende i prema zakonodavstvu ove države, ali na ovaj način razrezani porez ne može da premaši:

a) 5% od bruto iznosa dividendi ako je korisnik društvo koje raspolaže neposredno s najmanje 25% kapitala društva koje plaća dividende,

b) 15% od iznosa bruto dividendi u svim drugim slučajevima.

(3) Izraz "dividende", upotrijebljen u ovom članu, označava prihode koji potiču od akcija, akcija ili bonova uživanja, rudarskih učešća, učešća osnivača ili drugih povlaštenih učešća sa izuzetkom potraživanja, kao i prihode drugih učešća u raspodjeli koji su izjednačeni s prihodima od akcija od strane poreskog zakonodavstva zemlje ugovornice čiji je rezident društvo isplatilac dividendi.

(4) Odredbe st. 1 i 2 ovog člana ne primjenjuju se kad korisnik dividendi, rezident jedne države, ima u drugoj državi, čiji je rezident društvo koje plaća dividende, stalno mjesto poslovanja kome stvarno

pripada učešće iz koga proizlazi pravo na dividende. U ovom slučaju se primjenjuju odredbe člana 7 ovog sporazuma.

(5) Lice koje je rezident Jugoslavije i koje prima dividende isplaćene od strane društva rezidenta Francuske, može da traži povraćaj akontacija koje se odnose na primljene dividende, a koje je platilo društvo isplatalac, s tim da se pri tom uzme u obzir odbitak predviđen u stavu 2 ovog člana.

(6) Kad društvo koje je rezident Jugoslavije raspolaže u Francuskoj stalnim mjestom poslovanja, može da bude podvrgnuto naplati poreza obustavom u uslovima koje predviđa francusko interno zakonodavstvo.

## Član 11.

### KAMATE

(1) Kamate koje potiču iz jedne države ugovornice, a plaćaju se rezidentu druge države ugovornice, podliježe porezu samo u toj drugoj državi.

(2) Izraz "kamate", upotrijebljen u ovom članu, označava prihode od javnih fondova, obligacija po osnovu zajmova, sa ili bez hipotekarnih garancija (ili klauzule o učešću u dohotku), depozite i potraživanja svake vrste, kao i sve druge prihode koji su prema poreskom zakonodavstvu države odakle potiču prihodi izjednačeni s prihodima od pozajmljenih iznosa.

(3) Odredba stava 1 ovog člana ne primjenjuje se kad korisnik kamata, rezident jedne države ugovornice, ima, u drugoj državi ugovornici odakle potiču kamate, stalno mjesto poslovanja kome stvarno pripada potraživanje na osnovu koga se primjenjuju kamate. U ovom slučaju se primjenjuju odredbe člana 7 ovog sporazuma.

(4) Smatra se da kamate potiču iz jedne države ugovornice kad je dužnik sama ta država (njena teritorijalno-politička jedinica), lokalna zajednica ili rezident ove države. Međutim, kad dužnik kamata, bilo da je ili ne rezident jedne države ugovornice, ima u drugoj državi ugovornici stalno mjesto poslovanja u čiju je korist zaključen zajam za koji se kamate plaćaju i koji snosi teret ovih kamata, smatra se da pomenute kamate potiču iz države ugovornice gdje se nalazi stalno mjesto poslovanja.

(5) Ako, zbog posebnih odnosa koji postoje između dužnika i povjerioca ili koje jedan ili drugi održavaju s trećim licima, iznos plaćenih kamata, uzimajući u obzir potraživanje za koje su plaćene, premaši iznos koji bi bio utvrđen između dužnika i povjerioca u odsustvu sličnih odnosa, odredbe ovog člana se primjenjuju samo do posljednjeg iznosa. U ovom slučaju dio koji premašuje plaćanja podliježe porezu, saglasno zakonodavstvu svake države ugovornice, s tim što se vodi računa o drugim odredbama ovog sporazuma.

## Član 12.

### NAKNADE

(1) Naknade koje potiču iz jedne države ugovornice i plaćaju se rezidentu druge države ugovornice podliježu porezu samo u ovoj drugoj državi.

(2) Izraz "naknade", upotrijebljen u ovom članu, označava naknade svake prirode koje se plaćaju za upotrebu ili koncesiju upotrebe autorskog prava na književno, umjetničko ili naučno djelo, podrazumijevajući tu i kinematografske filmove i filmove i magnetofonske trake za televiziju ili radio-difuziju, patente, fabričkog i trgovinskog uslužnog žiga, crteža ili modela, plana, formule ili trajnog

postupka, kao i za upotrebu ili koncesiju upotrebe industrijske, trgovinske i naučne opreme, i za informacije koje su u vezi sa stečenim iskustvom u industrijskoj, trgovinskoj ili naučnoj oblasti.

(3) Odredba stava 1 ovog člana ne primjenjuje se kad korisnik naknada, rezident jedne države ugovornice, obavlja u drugoj državi ugovornici odakle naknade potiču industrijsku, trgovinsku ili zanatsku djelatnost posredstvom stalnog mjesta poslovanja, ili neku nezavisnu djelatnost posredstvom stalne baze i kada pravo ili dobro iz koga potiče pravo na naknadu stvarno pripada stalnom mjestu poslovanja, odnosno nezavisnoj djelatnosti. Pod ovom pretpostavkom primjenjuju se odredbe člana 7 ili člana 14 ovog sporazuma.

(4) Ako, zbog posebnih odnosa, koji postoje između dužnika i povjerioca ili koje jedan i drugi održavaju sa trećim licima, iznos plaćenih naknada, vodeći računa o davanju za koje su plaćene, premašuje iznos koji bi bio dogovoren između dužnika i povjerioca u odsustvu sličnih odnosa, odredbe ovog člana se primjenjuju samo na ovaj posljednji iznos. U ovom slučaju dio viška plaćanja podliježe porezu saglasno zakonodavstvu svake države ugovornice, s tim što se vodi računa o drugim odredbama ovog sporazuma.

### Član 13.

#### DOHODAK OD OTUĐENJA IMOVINE

#### **[ZAMJENJEN članom 9. stav 4. MLI]**

[(1) Dohodak koji potiče od otuđenja nepokretnih dobara, kako su definisana u članu 6 stav 2 ovog sporazuma, ili od otuđenja učešća ili sličnih prava u društvu čija se aktiva uglavnom sastoji iz nepokretnih dobara, podliježe porezu u državi ugovornici gdje se ova nepokretna dobra nalaze. ]

Član 9. stav 4. MLI mijenja član 13. stav 1. ovog Sporazuma:

#### **ČLAN 9. MLI - KAPITALNI DOBITAK OD OTUĐENJA AKCIJA ILI INTERESA ENTITETA KOJI SVOJU VRIJEDNOST OSTVARUJU UGLAVNOM OD NEPOKRETNOSTI**

Za potrebe ovog Sporazuma dobitak koji ostvari rezident Države ugovornice od otuđenja akcija ili uporedivih interesa, kao što su interesi u partnerstvu ili trustu, mogu se oporezovati u drugoj Državi ugovornici ako su, u bilo kojem periodu tokom 365 dana prije otuđenja, ove akcije ili uporedivi interesi više od 50 posto svoje vrijednosti ostvarili neposredno ili posredno od nepokretnosti koja se nalazi u toj drugoj Državi ugovornici.

(2) Dohodak koji potiče od otuđenja pokretnih dobara koja predstavljaju dio aktive stalnog mjesta poslovanja koje preduzeće jedne države ugovornice ima u drugoj državi ugovornici, ili pokretna dobra koja sačinjavaju stalnu bazu s kojom raspolaže rezident jedne države ugovornice u drugoj državi ugovornici u cilju obavljanja neke nezavisne djelatnosti, podrazumijevajući ovdje ovakvu dobit koja potiče od ukupnog otuđenja tog stalnog mjesta poslovanja (samog ili sa cijelim preduzećem) ili te stalne baze, podliježe porezu u toj drugoj državi.

(3) Dohodak koji potiče od otuđenja brodova ili aviona koji se koriste u međunarodnom saobraćaju i pokretnih dobara koja služe eksploataciji pomenutih brodova i aviona, podliježe porezu samo u državi ugovornici gdje se nalazi stvarno sjedište uprave.

## Član 14.

### NEZAVISNE DJELATNOSTI

(1) Dohodak koji rezident jedne države ugovornice ostvaruje od nezavisnih djelatnosti podliježe porezu samo u toj državi, osim ukoliko se pomenute aktivnosti ne vrše u drugoj državi ugovornici. Dohodak koji potiče od nezavisne djelatnosti koja se vrši u drugoj državi ugovornici podliježe porezu u toj drugoj državi.

(2) Nezavisno od odredbe stava 1 ovog člana, dohodak koji rezident jedne države ugovornice dobija od nezavisnih djelatnosti koje vrši u drugoj državi ugovornici ne podliježe porezu u toj drugoj državi:

a) ako korisnik boravi u drugoj državi ugovornici za vrijeme perioda ili perioda koji ne premašuju ukupno 183 dana u toku poreske godine u pitanju,

b) ako korisnik ne raspolaže stalnom bazom u drugoj državi za vrijeme perioda ili perioda koji premašuju ukupno 183 dana u toku pomenute godine,

(3) Izraz "nezavisne djelatnosti" označava sve djelatnosti - sa izuzetkom trgovinskih, industrijskih ili poljoprivrednih - koje vrši za svoj sopstveni račun, na nezavisan način, lice koje ostvaruje dohodak ili snosi gubitke koji potiču od ovih djelatnosti.

## Član 15.

### ZAVISNE DJELATNOSTI

(1) Ukoliko drukčije nije predviđeno odredbama čl. 16, 18 i 19 ovog sporazuma, nadnice, plate i druge slične naknade koje rezident jedne države ugovornice prima po osnovu radnog odnosa podliježe porezu samo u toj državi, osim ako rezident nije zaposlen u drugoj državi ugovornici. Ako je tamo zaposlen, naknade primljene po tom osnovu podliježu porezu u toj drugoj državi.

(2) Nezavisno od odredbe stava 1. ovog člana, naknade koje rezident jedne države ugovornice prima po osnovu radnog odnosa u drugoj državi ugovornici podliježe porezu samo u prvoj državi:

a) ako korisnik boravi u drugoj državi za vrijeme jednog ili više perioda koji ne premašuju ukupno 183 dana u toku poreske godine u pitanju,

b) ako su naknade plaćene od strane poslodavca ili u ime poslodavca koji nije rezident druge države;

c) ako teret naknade ne snosi stalno mjesto poslovanja ili stalna baza koju poslodavac ima u drugoj državi.

(3) Nezavisno od prethodnih odredaba ovog člana, naknade po osnovu radnog odnosa na brodu ili avionu u međunarodnom saobraćaju podliježu porezu u državi ugovornici gdje se nalazi stvarna uprava preduzeća.

## Član 16.

### TANTIJEVI

(1) Tantijske, žetoni prisutnosti i druge slične naknade koje rezident Jugoslavije prima u svojstvu člana upravnog odbora, direktorijuma ili nadzornog odbora društva koje je rezident Francuske podliježu porezu u ovoj državi.

(2) Naknade slične vrste koje rezident Francuske prima za obavljanje funkcija sličnih onima koje su definisane u stavu 1 ovog člana u preduzeću koje je rezident Jugoslavije podliježu porezu u ovoj državi.

## Član 17.

### UMJETNICI I SPORTISTI

Nezavisno od odredaba čl. 14 i 15 ovog sporazuma, dohoci koje ostvaruju profesionalni umjetnici, kao što su pozorišni, filmski, radija ili televizije i muzičari, kao i sportisti od svojih profesionalnih djelatnosti u tom svojstvu, podliježe porezu u državi ugovornici gdje se ove djelatnosti obavljaju.

## Član 18.

### PENZIJE

Izuzimajući slučajeve predviđene odredbom člana 19 ovog sporazuma, penzije i druge slične naknade, koje se plaćaju rezidentu jedne države ugovornice po osnovu ranijeg zaposlenja, podliježu porezu samo u toj državi.

## Član 19.

### JAVNE FUNKCIJE

Naknade, podrazumijevajući tu i penzije, isplaćene od strane jedne države ugovornice (ili jedne od njenih društveno-političkih zajednica) ili interesnih zajednica, ili javne ustanove ove države, bilo neposredno bilo na teret formiranih fondova, fizičkom licu po osnovu službe obavljene u ovoj državi (društveno-političkoj zajednici) ili interesnoj zajednici, ili u javnoj ustanovi, za vršenje funkcija javnog karaktera, podliježu porezu u toj državi

## Član 20.

### PROFESORI

Rezident jedne države ugovornice koji boravi u drugoj državi ugovornici prije svega u cilju obavljanja nastave ili da bi se bavio istraživačkim radovima, ili u jednom i drugom od ovih ciljeva, oslobođen je poreza u ovoj posljednjoj državi ugovornici, za vrijeme perioda koji ne premašuje dvije godine računajući od dana njegovog dolaska u pomenutu državu, na dohotke koji potiču od ličnih usluga učinjenih u nastavi ili istraživanju.

Ova odredba ne primjenjuje se na dohotke koji potiču, od radova u nastavi i istraživanju ako se ovi radovi ne vrše u javnom interesu nego, prije svega, s ciljem da se ostvari posebna korist koja koristi jednom ili više određenih lica.

## Član 21.

### STUDENTI I STAŽERI

(1) Ako student ili stažer rezident jedne države ugovornice boravi u drugoj državi ugovornici sa jednim ciljem da tu studira ili da se usavršava, iznosi koje prima radi pokrića troškova izdržavanja, studija ili usavršavanja ne podliježu porezu u ovoj drugoj državi.

(2) Na isti način se tretira naknada koju takav student ili stažer prima po osnovu zaposlenja u državi ugovornici gdje studira ili se usavršava, pod uslovom da je ova naknada nužna za njegovo izdržavanje.

## Član 22.

Elementi dohotka rezidenta jedne države ugovornice koji nisu izričito pomenuti u prethodnim članovima ovog sporazuma podliježu porezu samo u toj državi.

### GLAVA IV

## Član 23.

### ODREDBE O IZBJEGAVANJU DVOSTRUKOG OPOREZIVANJA

Dvostruko oporezivanje se izbjegava na sljedeći način:

(1) U Francuskoj;

a) dohoci, sa izuzetkom onih koji su predviđeni u tački b), oslobođeni su francuskih poreza predviđenih u članu 2 stav 3a) ovog sporazuma kad ovi dohoci podliježe porezu u Jugoslaviji na osnovu ovog sporazuma,

b) što se tiče dohodaka predviđenih u čl. 10, 16 i 17 ovog sporazuma koji su opterećeni jugoslovenskim porezom saglasno odredbama ovih članova, Francuska priznaje licima koja su rezidenti Francuske i koja primaju takve dohotke prava na odbitak od iznosa jugoslovenskog poreza,

Ovo pravo na odbitak, koji ne može, da premaši iznos poreza koji se u Francuskoj naplaćuje na odnosne prihode ostvaruje se odbitkom od poreza na koji se odnosi član 2 stav 3a) ovog sporazuma, u čijim su osnovicama sadržani pomenuti prihodi.

c) nezavisno od odredaba tač. a) i b), francuski porez može da bude obračunat na dohodak koji podliježe porezu u Francuskoj na osnovu ovog sporazuma po stopi koja odgovara iznosu ukupnog prihoda; saglasno francuskom zakonodavstvu.

(2) U Jugoslaviji;

a) dohoci su oslobođeni jugoslovenskih poreza pomenutih u članu 2. stav 3b) ovog sporazuma kad ovi dohoci podliježu porezu u Francuskoj na osnovu ovog sporazuma.

b) nezavisno od odredbe tačke a), jugoslovenski porez može da bude obračunat na oporezovani dohodak u Jugoslaviji na osnovu ovog sporazuma po stopi koja odgovara ukupnom iznosu poreza na dohodak koji podliježe oporezivanju, saglasno jugoslovenskom zakonodavstvu.

## GLAVA V

### POSEBNE ODREDBE

#### Član 24.

#### JEDNAK TRETMAN

(1) Državljeni jedne države ugovornice, bilo da su ili ne rezidenti jedne od država ugovornica, ne podliježu u drugoj državi ugovornici nikakvom oporezivanju ili obavezi koja se odnosi na oporezivanje ako je drukčija ili teža od obaveze kojoj su ili mogu da budu podvrgnuti državljani ove druge države koji se nalaze u istom položaju.

Posebno, državljani jedne od dvije države ugovornice, koji podliježu porezu na teritoriji druge države, uživaju u istim uslovima, kao i državljani ove posljednje države, smanjenje osnovice, odbitka i smanjenje poreza ili ma kojih drugih taksa koji se priznaju zbog opterećenosti porodicom.

(2) Termin "državljeni" označava:

a) sva fizička lica koja imaju državljanstvo jedne od dvije države,

b) sva pravna lica, društvena lica i udruženja obrazovana saglasno zakonodavstvu koje se primjenjuje u jednoj od dvije države.

(3) Apatridi koji su rezidenti jedne od država ugovornica ne podliježu u jednoj i drugoj od ovih država nikakvom oporezivanju ili obavezi koja se odnosi na oporezivanje ako je drukčija ili teža od obaveze kojoj su ili mogu da budu podvrgnuti državljani odnosno države koji se nalaze u istom položaju.

(4) Oporezivanje stalnog mjesta poslovanja koje preduzeće jedne od država ima u drugoj državi ne može da bude sprovedeno u toj drugoj državi na nepovoljniji način nego oporezivanje preduzeća te druge države koja se bave istom aktivnošću.

(5) Preduzeća jedne od država čiji je kapital, u cjelini ili djelimično, neposredno ili posredno u rukama ili je kontrolisan od strane jednog ili više rezidenata druge države, nisu podvrgnuta u prvoj državi nikakvom oporezivanju ili obavezi koja se odnosi na oporezivanje ako je drukčija ili teža od obaveze kojoj su ili će moći da budu podvrgnuta druga preduzeća iste prirode ove posljednje države.

(6) Termin "oporezivanje" označava u ovom članu poreze svake vrste ili naziva.

(7) Odredbe ovog sporazuma ne ograničavaju povlastice date rezidentima na osnovu zakonodavstva svake od dviju država ili na osnovu međunarodnih sporazuma.

#### Član 25.

#### SPORAZUMNI POSTUPAK

(1) Kada rezident jedne države ugovornice smatra da mjere preduzete od strane jedne države ugovornice ili od obje države povlače ili mogu da povuku za njega oporezivanje koje nije saglasno ovom sporazumu, može, nezavisno od pravnog leka koji predviđa interno zakonodavstvo ovih država, svoj slučaj da podnese nadležnom organu države ugovornice čiji je rezident.

Sljedeći član 16. stav 1. druga rečenica MLI se primjenjuje i ima prednost nad odredbama ovog Sporazuma<sup>1</sup>:

#### ČLAN 16. MLI - POSTUPAK ZAJEDNIČKOG DOGOVARANJA

Slučaj mora biti izložen u roku od tri godine od dana prve informacije o mjeri koja dovodi do oporezivanja koje nije u skladu s odredbama ovog Sporazuma.

(2) Ovaj nadležni organ će nastojati, ako mu se reklamacija učini osnovanom, a sam nije u mogućnosti da donese zadovoljavajuću odluku, da pitanje riješi sporazumno sa nadležnim organom druge države ugovornice, s ciljem da se izbjegne oporezivanje koje nije saglasno Sporazumu.

(3) Nadležni organi država ugovornica nastojeće da putem sporazuma rješavaju teškoće na koje se može naići u primjeni Sporazuma. Oni se također mogu konsultovati u cilju izbjegavanja dvostrukog oporezivanja u slučajevima koji nisu Sporazumom predviđeni.

(4) Nadležni organi država ugovornica mogu putem neposrednog međusobnog opštenja nastojati da ostvare Sporazum u smislu označenom u prethodnim stavovima. Ako izmjene usmenih gledišta olakšavaju ovaj sporazum, ove izmjene gledišta mogu da se sprovedu u okviru posebne komisije sastavljene od predstavnika nadležnih organa država ugovornica.

(5) Nadležni organi država ugovornica utvrđuju način primjene ovog sporazuma.

#### Član 26.

#### RAZMJENA OBAVJEŠTENJA

(1) Nadležni organi država ugovornica razmjenjuju obavještenja potrebna za primjenu odredaba ovog sporazuma i odredaba internih zakona država ugovornica koji se odnose na poreze predviđene ovim sporazumom, ukoliko je oporezivanje koje ovi zakoni predviđaju saglasno Sporazumu. Svako obavještenje koje se na ovaj način razmjenjuje smatra se tajnim i može da bude stavljeno na uvid samo licima i organima ovlaštenim za razrez ili naplatu poreza predviđenih ovim sporazumom.

(2) Odredbe stava 1. ovog člana ne mogu ni u kom slučaju da budu tumačene kao da obavezuju jednu državu ugovornicu:

a) da preduzima administrativne mjere koje suprotivne njenom sopstvenom zakonodavstvu ili njenoj administrativnoj praksi ili praksi druge države ugovornice,

b) da daje obavještenje koja ne bi mogla da budu dobijena na osnovu njenog sopstvenog zakonodavstva ili u okviru normalne administrativne prakse ili zakonodavstva i prakse druge države ugovornice,

c) da pruža obavještenje koja bi mogla da otkriju neku trgovinsku, industrijsku, profesionalnu tajnu ili trgovinski postupak ili obavještenje čije bi davanje bilo protivno javnom poretku.

<sup>1</sup> U skladu sa članom 35. stav 4. MLI, član 16. MLI, u odnosu na ovaj Sporazum, primjenjuje se, za slučaj koji je nadležnom organu [Države ugovornice] izložen 01. januara ili poslije 01. januara 2021. godine, osim u slučajevima koji tog datuma nisu mogli biti izloženi u skladu sa ovim Sporazumom, prije nego što je izmijenjen MLI, bez obzira na period oporezivanja na koji se slučaj odnosi.



## Član 27.

### DIPLOMATSKI I KONZULARNI FUNKCIONERI

- (1) Odredbe ovog sporazuma ne diraju u poreske povlastice koje uživaju diplomatski ili konzularni funkcioneri na osnovu bilo opštih pravila međunarodnog javnog prava, bilo odredaba posebnih sporazuma.
- (2) Ukoliko, iz razloga poreskih privilegija koje uživaju diplomatski i konzularni funkcioneri, na osnovu opštih pravila međunarodnog prava ili odredaba posebnih međunarodnih sporazuma, dohodak ili imovina nisu oporezovani u državi kod koje se akredituju, pravo na oporezivanje pripada državi koja akredituje.
- (3) U svrhe primjene ovog sporazuma, članovi diplomatske i konzularne misije jedne države ugovornice akreditovani u drugoj državi ugovornici ili trećoj državi koji su državljani države koja ih je akreditovala, smatraju se kao rezidenti države koja ih je akreditovala ako podliježu istim obavezama, po osnovu poreza na dohodak i na imovinu, kao rezidenti pomenute države.
- (4) Sporazum se ne primjenjuje na međunarodne organizacije, njihove organe i funkcionere, ni na lica koja kao članovi diplomatskih i konzularnih misija trećih država borave u jednoj državi ugovornici i ne smatraju se rezidentima jedne ili druge države ugovornice u pogledu poreza na dohodak i imovinu.

Sljedeći član 7. stav 1. MLI se primenjuje i ima prednost nad odredbama ovog Sporazuma:

#### ČLAN 7. stav 1. MLI - SPRJEČAVANJE ZLOUPOTREBE UGOVORA

1. Iznimno od odredbi ovog Sporazuma, olakšica iz ovog Sporazuma ne odobrava se u odnosu na dio dohotka ili imovine, ako se osnovano može zaključiti, uzimajući u obzir sve relevantne činjenice i okolnosti, da je sticanje olakšica bio jedan od osnovnih razloga bilo kojeg aranžmana ili transakcije koji su izravno ili neizravno rezultirali tom pogodnošću, osim ako se ustanovi da bi odobravanje te olakšice u tim okolnostima bilo u skladu sa ciljem i svrhom odgovarajućih odredaba ovog Sporazuma.

## Član 28.

### TERITORIJALNO PROŠIRENJE

- (1) Ovaj sporazum se može proširiti, ovakav kakav je ili sa potrebnim izmjenama, na prekomorske teritorije Republike Francuske koje ubiru poreze sličnog karaktera porezima na koje se primjenjuje Sporazum. Ovakvo proširenje stupa na snagu počev od dana, sa izmjenama i uslovima, podrazumijevajući tu i uslove koji se odnose na prestanak primjene, koji su utvrđeni zajedničkim sporazumom između država ugovornica razmjenom diplomatskih nota ili prema nekom drugom postupku, saglasno njihovim ustavnim odredbama.
- (2) Ukoliko se dvije države ugovornice nisu drukčije sporazumjele, kad Sporazum bude otkazan od strane jedne od njih na osnovu člana 30 ovog sporazuma, Sporazum će prestati da se primjenjuje u uslovima predviđenim ovim članom, na svaku teritoriju na koju je Sporazum bio proširen saglasno ovom članu.

## Član 29.

### STUPANJE NA SNAGU

(1) Svaka država ugovornica obavještava drugu o izvršenju formalnosti predviđenih njenim internim zakonodavstvom za stupanje na snagu ovog sporazuma. Sporazum stupa na snagu prvog dana mjeseca koji slijedi mjesecu u toku kojeg je učinjeno posljednje saopštenje.

(2) Odredbe ovog sporazuma primjenjuju se prvi put:

(i) u pogledu, s jedne strane, poreza koji se naplaćuje obustavom na dividende, a s druge strane - na plaćanja predviđena u članu 10. stav 5. ovog sporazuma na prihode koji se naplaćuju počev od 01. januara godine kada je Sporazum stupio na snagu

(ii) u pogledu drugih poreza na dohodak, u poreskoj godini u toku koje je Sporazum stupio na snagu.

## GLAVA VI

### ZAVRŠNE ODREDBE

## Član 30.

### OTKAZIVANJE

(1) Ovaj sporazum ostaje na snazi sve dok ga jedna država ugovornica ne otkáže.

Međutim, svaka država može, pod uslovom da dostavi saopštenje šest mjeseci unaprijed diplomatskim putem, da otkáže Sporazum za kraj kalendarske godine, počev od pete godine računajući od dana stupanja na snagu.

U ovom slučaju, Sporazum se primjenjuje posljednji put:

a) u pogledu poreza koji se naplaćuje putem obustave na dividende, poreza čija će naplata uslijediti prije isteka kalendarske godine za čiji je kraj otkazivanje Sporazuma naznačeno,

b) u pogledu drugih poreza na dohodak, za oporezivanje dohodaka koji otpadaju na kalendarsku godinu za čiji je kraj otkazivanje Sporazuma najavljeno ili na poslovanje koje se zaključuje u toku ove godine.

## PROTOKOL

U času potpisivanja Sporazuma koji ima za cilj izbjegavanje dvostrukog oporezivanja u oblasti poreza na dohodak između Vlade Socijalističke Federativne Republike Jugoslavije i Vlade Republike Francuske, potpisani su se saglasili o sljedećim odredbama koje čine sastavni dio Sporazuma.

(1) U cilju primjene člana 8 Sporazuma, smatra se kao dohodak koji potiče od eksploatacije brodova i aviona u međunarodnom saobraćaju i dohodak ostvaren od sporednih djelatnosti niže nabrojanih:

(i) iznajmljivanja brodova i aviona u potpunosti opremljenih,

(ii) prodaja voznih karata za drugo preduzeće.

(2) Neće se smatrati da odredbe člana 24 Sporazuma zabranjuju Jugoslaviji da primjeni na francuske državljane koji ostvaruju dohotke iz izvora koji se nalaze u ovoj državi a nisu njeni rezidenti, poreski sistem koji se primjenjuje, prema jugoslovenskom zakonodavstvu, na poreske obveznike koji nisu rezidenti ukoliko iz primjene ovog oporezivanja ne proizlazi teže opterećenje od opterećenja koje bi tretiralo iste dohotke ako bi ih ostvarili jugoslovenski državljani.